



Broj: 11-3-049-2397/16
Datum: 16.03.2016. godine

Kurirom

BOSNA I HERCEGOVINA
PARLAMENTARNA SKUPŠTINA BiH
-Zajednička komisija za nadzor nad radom
Obavještajno-sigurnosne agencije BiH-

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

Trg Bosne i Hercegovine br. 1

PRIMLJENO: 21-03-2016			
Organizaciona jedinica	Klasifikaciona oznaka	Radni broj	Broj priloga
03/2-	04-	927/	16

SARAJEVO

PREDMET: Godišnji izvještaj o izvršenom operativnom i tehničkom nadzoru u oblasti zaštite tajnih podataka u 2015. godini, dostavlja se.-

Shodno obavezama iz čl. 76. Zakona o zaštiti tajnih podataka ("Službeni glasnik BiH" br. 54/05 i 12/09), u prilogu vam dostavljamo Izvještaj Ministarstva sigurnosti – Sektor za zaštitu tajnih podataka – Državni sigurnosni organ, o izvršenom operativnom i tehničkom nadzoru u oblasti zaštite tajnih podataka u 2015. godini, na upoznavanje i razmatranje.

S poštovanjem,

PRILOG: Kao u tekstu (15 listova).-

Dostavljeno:

- 1x naslovu
- 1x a/a





Broj: 11-3-

Datum: 16.03.2016. godine

IZVJEŠTAJ O OPERATIVNOM I TEHNIČKOM NADZORU U OBLASTI ZAŠTITE TAJNIH PODATAKA U 2015. GODINI

Sektor za zaštitu tajnih podataka Ministarstva sigurnosti BiH (Državni sigurnosni organ - DSO) je, u skladu sa članom 75. i članom 76. Zakona o zaštiti tajnih podataka ("Službeni glasnik BiH" broj: 54/05 i 12/09), u periodu od 01.01.-31.12.2015. godine provodio aktivnosti operativnog i tehničkog nadzora u oblasti zaštite tajnih podataka u institucijama na svim nivoima državne organizacije u Bosni i Hercegovini.

Nadzorne aktivnosti su prevashodno imale za cilj provjeru ispunjenosti propisanih uslova za prijem, obradu i čuvanje tajnih podataka (proces akreditacije i certifikacije sigurnosnih područja), te iniciranje provođenja mjera i aktivnosti zaštite tajnih podataka, kao i davanje potrebnih stručnih savjeta i instrukcija (instruktivni nadzor) na ispunjenju organizacionih, fizičkih i tehničkih odluka za zaštitu tajnih podataka koje su propisane odredbama Zakona o zaštiti tajnih podataka, podzakonskim aktima donesenim na osnovu tog Zakona, te NATO direktivama i Odlukama EU koje tretiraju ovu oblast, a shodno zaključenim sporazumima sa navedenim međunarodnim organizacijama.

Osim toga, nadzorne aktivnosti su također uključivale i prikupljanje potrebnih informacija, kao i analizu i pregled stanja o stepenu provedenih aktivnosti na uspostavi sigurnosnih područja za zaštitu tajnih podataka propisanih Zakonom o zaštiti tajnih podataka i podzakonskim aktima Vijeća ministara BiH iz ove oblasti.

I - NADZOR NAD SIGURNOSNIM PROVJERAMA, ORGANIZACIJSKIM, FIZIČKIM I TEHNIČKIM ODLUKAMA ZA ZAŠTITU TAJNIH PODATAKA (PERSONALNA, DOKUMENTACIONA I FIZIČKA SIGURNOST)

Nadzorne aktivnosti DSO-a su u 2015. godini bile usmjerene na potvrđivanje ispunjavanja propisanih uslova za obradu tajnih podataka od strane pojedinih institucija, ali i na provođenju nadzora nad postojanjem procedura sigurnosnih provjera, te organizacijskih, fizičkih i tehničkih odluka za zaštitu tajnih podataka u policijskim agencijama u BiH, kao „fokusnim tačkama“ interesovanja DSO-a, te drugim institucijama u Bosni i Hercegovini, ali i kompanijama i organizacijama koje će imati pristup tajnim podacima.

Rezultati navedenih nadzornih aktivnosti u 2015. godini su slijedeći:

Aktivnosti na certificiranju sigurnosnih područja/podregistara za zaštitu tajnih podataka u BiH:

1. **Ministarstvo odbrane Bosne i Hercegovine – certificirano sigurnosno područje/podregistar** za rukovanje tajnim podacima Bosne i Hercegovine do i uključujući stepen tajnosti „VRLO TAJNO“ i za rukovanje NATO tajnim podacima do i uključujući stepen tajnosti „NATO TAJNO/NATO SECRET“;

2. **Ministarstvo pravde Bosne i Hercegovine – certificirano sigurnosno područje za rukovanje tajnim podacima Bosne i Hercegovine do i uključujući stepen tajnosti „INTERNO“**(nisu ispunjeni svi aspekti personalne, dokumentacione i fizičke sigurnosti za „veće“ stepene tajnosti, a realizacija istih se očekuje u 2016. godini);
3. **Granična policija Bosne i Hercegovine – certificirano sigurnosno područje/podregistar za rukovanje tajnim podacima Bosne i Hercegovine do i uključujući stepen tajnosti „VRLO TAJNO“ i za rukovanje NATO tajnim podacima do i uključujući stepen tajnosti „NATO TAJNO/NATO SECRET“;**
4. **Državna agencija za istrage i zaštitu Bosne i Hercegovine (SIPA) - certificirano sigurnosno područje/podregistar za rukovanje tajnim podacima Bosne i Hercegovine do i uključujući stepen tajnosti „VRLO TAJNO“ i za rukovanje NATO tajnim podacima do i uključujući stepen tajnosti „NATO TAJNO/NATO SECRET“;**
5. **Policija Brčko distrikta Bosne i Hercegovine – certificirano sigurnosno područje za rukovanje tajnim podacima Bosne i Hercegovine do i uključujući stepen tajnosti „VRLO TAJNO“;**
6. **Ministarstvo unutrašnjih poslova Federacije Bosne i Hercegovine (F MUP) – certificirano sigurnosno područje za rukovanje tajnim podacima Bosne i Hercegovine do i uključujući stepen tajnosti „VRLO TAJNO“.**

Nakon certifikacije navedenih institucija sačinjeni su odgovarajući izvještaji sa mišljenjem DSO-a o ispunjenju minimuma standarda za rukovanje tajnim podacima. Izvještaji su dostavljeni navedenim institucijama na upoznavanje i otklanjanje uočenih nedostataka koji nisu predstavljali „smetnju“ za certifikaciju, ali koje je neophodno u najkraćem roku otkloniti i o istom pismeno obavijestiti DSO.

Nadzorne aktivnosti nad provođenjem organizacionih, fizičkih i tehničkih odluka za zaštitu tajnih podataka na pojedinačnim lokacijama na terenu, u institucijama koje su uputile zahtjev (instruktivni nadzor):

Shodno dostavljenim informacijama, ali i na osnovu upućenih zahtjeva u 2015. godini DSO je provodio aktivnosti instruktivnog nadzora na pojedinačnim lokacijama na terenu u cilju davanja neophodnih stručnih savjeta i instrukcija po pitanju uspostave potrebnih organizacionih, fizičkih i tehničkih mjera zaštite tajnih podataka te specificiranja potrebne sigurnosno-tehničke opreme za opremanje sigurnosnih područja za zaštitu tajnih podataka.

Nadzorne aktivnosti su izvršene na slijedećim lokacijama:

1. Sekretarijat Parlamerntarne Skupštine Bosne i Hercegovine;
2. Visoko sudsko i tužilačko vijeće Bosne i Hercegovine;
3. Tužilaštvo Bosne i Hercegovine;
4. Generalni sekretarijat Vijeća ministara Bosne i Hercegovine;
5. Služba za zajedničke poslove Institucija Bosne i Hercegovine;
6. Ministarstvo odbrane Bosne i Hercegovine;
7. Ministarstvo pravde Bosne i Hercegovine;
8. Ministarstvo vanjskih poslova Bosne i Hercegovine;
9. Ministarstvo za ljudska prava i izbjeglice Bosne i Hercegovine;
10. Ministarstvo civilnih poslova Bosne i Hercegovine;

11. Ministarstvo vanjske trgovine i ekonomskih odnosa Bosne i Hercegovine;
12. Državna agencija za istrage i zaštitu Bosne i Hercegovine (SIPA);
13. Granična policija Bosne i Hercegovine;
14. Direkcija za koordinaciju policijskih tijela Bosne i Hercegovine;
15. Uprava za indirektno oporezivanje Bosne i Hercegovine;
16. Agencija za zaštitu ličnih podataka u Bosni i Hercegovini;
17. Agencija za forenzička ispitivanja i vještačenja Bosne i Hercegovine;
18. Agencija za policijsku podršku BiH;
19. Policija Brčko distrikta Bosne i Hercegovine;
20. Ministarstvo unutrašnjih poslova Federacije Bosne i Hercegovine;
21. Ministarstvo unutrašnjih poslova Republike Srpske;
22. Ministarstvo unutrašnjih poslova Bosansko-podrinjskog kantona Goražde;
23. Ministarstvo unutrašnjih poslova Unsko-sanskog kantona Bihać;
24. Ministarstvo unutrašnjih poslova Hercegovačko-neretvanskog kantona Mostar.

O nadzornim aktivnostima su sačinjeni izvještaji i dostavljeni institucijama i policijskim agencijama na upoznavanje i postupanje. U izvještajima su navedene korektivne mjere koje je potrebno preduzeti kako bi se otklonili uočeni nedostaci i ispunio minimum neophodnih uslova za „rukovanje“ tajnim podacima. Također, u pojedinim izvještajima je specificirana vrsta i količina potrebne sigurnosno-tehničke opreme za zaštitu sigurnosnog područja na pojedinačnim lokacijama, kako bi se na vrijeme mogla planirati i osigurati budžetska sredstva za ove namjene, te kako bi se u što kraćem roku završilo sa uspostavom sigurnosnih područja i time stvorili uslovi za akreditaciju i certifikaciju navedenih institucija za rukovanje tajnim podacima, odnosno kako bi te institucije postale u potpunosti funkcionalne za prijem, obradu i distribuciju tajnih podataka u skladu sa Zakonom o zaštiti tajnih podataka i podzakonskim aktima donesenim na osnovu tog Zakona.

Aktivnosti na prikupljanju informacija o dostignutom stepenu uspostave sigurnosnih područja za zaštitu tajnih podataka:

Sektor za zaštitu tajnih podataka Ministarstva sigurnosti Bosne i Hercegovine – Državni sigurnosni organ je povodom aktivnosti na razvijanju sistema sigurnosnih područja za zaštitu tajnih podataka, a što uključuje i provođenje organizacionih, fizičkih i tehničkih odluka za zaštitu tajnih podataka, uputio zahtjev prema više institucija na nivou Bosne i Hercegovine, kao i prema policijskim agencijama u Bosni i Hercegovini, za dostavljanje informacije o dosadašnjim aktivnostima na uspostavi sigurnosnih područja za zaštitu tajnih podataka.

Nakon sagledavanja i analize, zaprimljene informacije u najkraćem se mogu opisati kako slijedi:

1. INSTITUCIJE BOSNE I HERCEGOVINE

Sekretarijat Parlamentarne Skupštine Bosne i Hercegovine – izvršen je proces nabavke jednog dijela sigurnosno-tehničke opreme za opremanje sigurnosnog područja shodno ranije dostavljenom izvještaju, tj. specifikaciji opreme od strane DSO-a. Za nedostajući dio sigurnosno-tehničke opreme predviđen je proces nabavke u 2016. godini. Upućen je pismeni zahtjev Službi za zajedničke poslove institucija BiH za određene građevinske radove koje je potrebno izvesti na lokaciji sigurnosnog područja. Pripremljen je nacrt sigurnosnog plana, kao i procedure koordiniranja aktivnosti u vezi sa kriznim situacijama. Ovaj Plan i procedure će biti usaglašeni sa Odjelom za unutrašnje osiguranje Zgrade Parlamentarne Skupštine BiH i

nadležnim policijskim agencijama. Rezervna lokacija još nije osigurana, ali je u toku rješavanje ovog pitanja. Dodijeljena je još jedna prostorija Parlamentarne Skupštine BiH (PS BiH) za potrebe održavanja „povjerljivih“ sjednica za radna tijela PS BiH koja obrađuju tajne podatke. U 2016. godini je planirano opremanje i ove prostorije sigurnosno-tehničkom opremom. Izvršeno je TEMPEST mjerenje na lokaciji budućeg sigurnosnog područja. Nakon nabavke i ugradnje nedostajuće opreme ponovno će biti kontaktiran DSO radi vršenja nadzornih aktivnosti u svrhu akreditacije i certifikacije sigurnosnog područja.

Predsjedništvo Bosne i Hercegovine – Nije dostavljena informacija o aktivnostima na uspostavi sigurnosnog područja u 2015. godini. Dana 17.12.2014. godine održan je radni sastanak na temu Primjene Zakona o zaštiti tajnih podataka sa predstavnicima Sekretarijata Predsjedništva BiH i o navedenom sastanku je sačinjen zapisnik sa uputstvima o redoslijedu aktivnosti koji je potrebno preduzeti da bi se u Predsjedništvu BiH u potpunosti implementirao Zakon o zaštiti tajnih podataka i podzakonski akti doneseni na osnovu tog Zakona. Zapisnik je proslijeđen Predsjedništvu BiH na upoznavanje i postupanje po istom.

Visoko sudsko i tužilačko vijeće Bosne i Hercegovine (VSTV BiH) – U sklopu IPA Projekta „Konsolidacija i dalji razvoj pravosudnog komunikacionog i informacionog sistema“ trenutno se implementira softversko rješenje za sprječavanje gubitka podataka (Data Loss Prevention System) u pravosuđu BiH. Ovo obuhvata unaprijeđenje sigurnosti podataka i onemogućava „curenje“ osjetljivih podataka, odnosno neovlašteni pristup i distribuciju ovih podataka, a što, kako smo obaviješteni, uključuje i tajne podatke u smislu Zakona o zaštiti tajnih podataka ukoliko isti budu proizvedeni i pohranjeni u elektronskom obliku. Pokrenut je postupak javne nabavke proširenja sistema kontrole pristupa prostorijama kompleksa pravosudnih institucija (ECCOS Inženjering FORTRESS“), a formirana je i radna grupa za operativnu implementaciju Zakona o zaštiti tajnih podataka, te pripremljena lista koraka koje treba preduzeti na imenovanju osoba, donošenju odluka te ažuriranju evidencija.

Sud Bosne i Hercegovine – Planirana su budžetska sredstva za uspostavu sigurnosnog područja (period 2015.-2017. godina, po 8.000 KM za svaku godinu – ukupno 24.000 KM). Pokrenuta je procedura javnih nabavki za sigurnosna vrata i sef po propisanim tehničkim standardima (ranije je već nabavljen jedan sef manjih dimenzija u kancelariji sigurnosnog službenika po propisanim tehničkim standardima). Također, dogovoreno je izvođenje potrebnih građevinskih radova na budućim prostorijama sigurnosnog područja sa Službom za zajedničke poslove institucija BiH. Nabavka i ugradnja nedostajućeg dijela potrebne sigurnosno-tehničke opreme, tj. alarmnog sistema i sistema kontrole pristupa je planirana u 2016. godini. Nakon izvršenih potrebnih radova, te nabavke i ugradnje nedostajuće sigurnosno-tehničke opreme DSO će biti blagovremeno obaviješten u cilju akreditacije i certifikacije sigurnosnog područja.

Tužilaštvo Bosne i Hercegovine – Donesena je Odluka o listi radnih mjesta za pristup tajnim podacima i određene su prostorije za uspostavu sigurnosnog područja za zaštitu tajnih podataka. Dana 26.10.2015. godine izvršene su aktivnosti instruktivnog nadzora i sačinjen je izvještaj u kojem su precizirane potrebne organizacione, fizičke i tehničke mjere zaštite koje je potrebno uspostaviti u i oko sigurnosnog područja. Također, u navedenom izvještaju je specificirana sigurnosno-tehnička oprema kojom je potrebno opremiti sigurnosno područje za zaštitu tajnih podataka u Tužilaštvu Bosne i Hercegovine.

Generalni sekretarijat Vijeća ministara Bosne i Hercegovine (GENSEK VM BiH) – Donesena je odluka o radnim mjestima za koja je potrebna sigurnosna provjera, ali još uvijek nisu određene prostorije za uspostavu sigurnosnog područja za zaštitu tajnih podataka. Dana 29.09.2015. godine održan je radni sastanak u prostorijama GENSEK-a VM BiH na temu primjene Zakona o zaštiti tajnih podataka. Tokom sastanka je definisan redoslijed postupaka i

aktivnosti koje je potrebno da preduzme GENSEK VM BiH kako bi se što prije implementirali propisi iz oblasti zaštite tajnih podataka u toj instituciji. Također, naglašeno je da je potrebno što prije da se odrede prostorije za uspostavu sigurnosnog područja, kao i da se predvide potrebna budžetska sredstva za implementaciju propisa iz oblasti zaštite tajnih podataka, a što je i zakonska obaveza svih institucija u Bosni i Hercegovini koje rukuju ili imaju pristupa tajnim podacima. Zapisnik o održanom sastanku je prosljeđen GENSEK-u VM BiH na upoznavanje i postupanje po istom.

Služba za zajedničke poslove institucija Bosne i Hercegovine – Okončana je faza arhitektonsko-građevinskih radova na lokaciji sigurnosnog područja i trenutno je u toku faza nabavke i ugradnje potrebne sigurnosno-tehničke opreme. Nakon okončanja ovih aktivnosti biće upućen zahtjev DSO-u za nadzorne aktivnosti u svrhu akreditacije i certifikacije sigurnosnog područja.

Ministarstvo odbrane Bosne i Hercegovine (MO BiH) – uglavnom su ispunjene ili će do kraja 2015. godine biti ispunjene sve korektivne mjere navedene u ranijem izvještaju DSO-a (ovo uključuje i uspostavu, te opremanje sigurnosno-tehničkom opremom kancelarije sigurnosnog službenika) kojim je sigurnosno područje/podregistar u MO BiH certificiran za rukovanje tajnim podacima Bosne i Hercegovine do i uključujući stepen tajnosti „VRLO TAJNO“, odnosno za rukovanje NATO tajnim podacima do i uključujući stepen tajnosti „NATO TAJNO/NATO SECRET“.

Ministarstvo vanjskih poslova Bosne i Hercegovine (MVP BiH) – što se tiče korektivnih mjera i otklanjanja uočenih nedostataka navedenih u ranijem izvještaju DSO-a iz 2013. godine, kojim je sigurnosno područje/podregistar u MVP BiH certificirano za rukovanje NATO tajnim podacima do i uključujući stepen tajnosti „NATO TAJNO/NATO SECRET“, pomenute korektivne mjere su se uglavnom odnosile na ispunjavanje potrebnih standarda za rukovanje tajnim podacima Bosne i Hercegovine. U tom smislu izvršeno je proširivanje prostorija sigurnosnog područja za još dvije prostorije smještene odmah do ranije prostorije sigurnosnog područja, a što u stvari sada čini jednu cjelinu. Izvršeno je opremanje pomenutih prostorija potrebnom sigurnosno-tehničkom opremom u skladu sa odgovarajućim standardima, a jedna od tih prostorija će predstavljati i buduću kancelariju sigurnosnog službenika. Još uvijek nisu ispunjeni svi preduslovi sa aspekta personalne i dokumentacione sigurnosti kako bi sigurnosno područje u MVP BiH bilo certificirano za rukovanje tajnim podacima Bosne i Hercegovine „većih“ stepena tajnosti. Dana 23.11.2015. godine održan je radni sastanak po ovim pitanjima sa predstavnicima MVP BiH i na tom sastanku definisan je redoslijed aktivnosti koji je potrebno preduzeti da bi se u što kraćem roku u MVP BiH ispunili svi potrebni preduslovi sa aspekta personalne i dokumentacione sigurnosti kako bi sigurnosno područje u MVP BiH bilo certificirano za rukovanje tajnim podacima Bosne i Hercegovine do i uključujući stepen tajnosti „VRLO TAJNO“.

Ministarstvo finansija i trezora Bosne i Hercegovine – Izvršena je preraspodjela sredstava za 2013. godinu i kupljen je sigurnosni sef koji je smješten u budućoj prostoriji sigurnosnog područja. U 2015. godini su planirana budžetska sredstva u iznosu od 30.000 KM za ove namjene. U toku je postupak pripremanja dokumentacije za postupak javne nabavke i ugradnje potrebne sigurnosno-tehničke opreme. Očekuje se da će ove aktivnosti biti završene do kraja 2015. godine nakon čega će biti upućen zahtjev DSO-u za akreditaciju i certifikaciju sigurnosnog područja.

Ministarstvo prometa i komunikacija Bosne i Hercegovine – Nije dostavljena informacija o aktivnostima na uspostavi sigurnosnog područja u 2015. godini. Ranije je donesena odluka o imenovanju sigurnosnog službenika, administratora i kurira za prijenos tajnih

podataka i u toj odluci je i određena prostorija za uspostavu sigurnosnog područja za zaštitu tajnih podataka. Dana 24.12.2014. godine su izvršene aktivnosti instruktivnog nadzora i sačinjen je izvještaj u kojem su precizirane potrebne organizacione, fizičke i tehničke mjere zaštite koje je potrebno uspostaviti u i oko sigurnosnog područja. U navedenom izvještaju je specificirana sigurnosno-tehnička oprema kojom je potrebno opremiti sigurnosno područje za zaštitu tajnih podataka u Ministarstvu prometa i komunikacija BiH. Izvještaj je proslijeđen Ministarstvu prometa i komunikacija BiH na upoznavanje i postupanje po istom.

Ministarstvo vanjske trgovine i ekonomskih odnosa Bosne i Hercegovine (MVTEO BiH) – Dana 17.09.2015. godine održan je radni sastanak u prostorijama MVTEO BiH na temu primjene Zakona o zaštiti tajnih podataka. Tokom sastanka je definisan redoslijed postupaka i aktivnosti koje je potrebno da preduzme MVTEO BiH kako bi se što prije implementirali propisi iz oblasti zaštite tajnih podataka u toj instituciji. Također, naglašeno je da je potrebno što prije da se odrede prostorije za uspostavu sigurnosnog područja, kao i da se predvide potrebna budžetska sredstva za implementaciju propisa iz oblasti zaštite tajnih podataka, a što je i zakonska obaveza svih institucija u Bosni i Hercegovini koje rukuju ili imaju pristupa tajnim podacima. Zapisnik o održanom sastanku je proslijeđen MVTEO BiH na upoznavanje i postupanje po istom. Ranije nisu vršene aktivnosti na implementaciji propisa iz oblasti zaštite tajnih podataka i uspostavi sigurnosnog područja za zaštitu tajnih podataka.

Ministarstvo civilnih poslova Bosne i Hercegovine – Kako smo obaviješteni, „prinudeni“ su bili zaustaviti započete aktivnosti na uspostavi sigurnosnog područja za zaštitu tajnih podataka zbog odlaska sigurnosnog službenika u penziju. U toku je postupak popune upražnjenog radnog mjesta sigurnosnog službenika nakon čega će biti što prije okončane aktivnosti na uspostavi sigurnosnog područja u skladu sa izvještajem DSO-a o instruktivnom nadzoru iz februara 2015. godine. Nakon okončanja aktivnosti na uspostavi sigurnosnog područja biće upućen zahtjev DSO-u za akreditaciju i certifikaciju sigurnosnog područja.

Ministarstvo za ljudska prava i izbjeglice Bosne i Hercegovine (MLJPI BiH) – Nije imenovana kontakt osoba sa DSO – sigurnosni službenik niti su određene prostorije za uspostavu sigurnosnog područja. U odgovoru je naglašeno da je potrebno donijeti nove Odluke o listi radnih mjesta za pristup tajnim podacima u MLJPI BiH, te da MLJPI BiH nije često u prilici da se susreće sa tajnim podacima niti je autor dokumenata koji nose određenu oznaku tajnosti. Zatražen je sastanak sa predstavnicima DSO-a na temu primjene propisa iz oblasti zaštite tajnih podataka koji je održan dana 23.12.2015. godine u prostorijama MLJPI BiH. Tokom sastanka je definisan redoslijed postupaka i aktivnosti koje je potrebno da preduzme MLJPI BiH kako bi se što prije implementirali propisi iz oblasti zaštite tajnih podataka u toj instituciji. Istaknuta je potreba da se izvrši revidiranje donesene odluke o listi radnih mjesta kao i ranije donesenog pravilnika u MLJPI BiH vezano za rukovanje tajnim podacima, u smislu potrebnih izmjena ili dopuna pomenutih podzakonskih akata. Također, naglašeno je da je potrebno što prije da se odrede prostorije za uspostavu sigurnosnog područja, kao i da se predvide potrebna budžetska sredstva za implementaciju propisa iz oblasti zaštite tajnih podataka, a što je i zakonska obaveza svih institucija u Bosni i Hercegovini koje rukuju ili imaju pristupa tajnim podacima.

Ministarstvo pravde Bosne i Hercegovine – Sigurnosno područje je uspostavljeno, certificirano za razmjenu tajnih podataka Bosne i Hercegovine do i uključujući stepen tajnosti „INTERNO“, dok je za rukovanje „većim“ stepenima tajnosti potrebno da se otklone još neki uočeni nedostatci i ispune određene korektivne mjere koje su navedene u izvještaju DSO-a nakon postupka akreditacije sigurnosnog područja u Ministarstvu pravde BiH. Trenutno se vrši proširenje sigurnosnog područja za još jednu dodijeljenu prostoriju. S tim u vezi, dana 03.11.2015. godine je izvršen obilazak pomenute prostorije i dogovoreno je sa predstavnicima Ministarstva pravde koje mjere fizičke i tehničke zaštite je potrebno uspostaviti u toj prostoriji

kako bi sigurnosno područje za zaštitu tajnih podataka u tom Ministarstvu bilo u potpunosti funkcionalno i certificirano za rukovanje tajnim podacima Bosne i Hercegovine „većih“ stepena tajnosti. Po završetku uspostave potrebnih mjera fizičke i tehničke zaštite koje još nisu uspostavljene, odnosno nakon uklanjanja određenih nedostataka i ispunjenja korektivnih mjera iz ranijeg izvještaja DSO-a biće ponovno upućen zahtjev DSO-u za certifikaciju sigurnosnog područja u Ministarstvu pravde BiH.

Uprava za indirektno oporezivanje Bosne i Hercegovine (UIO BiH) – Donesena je odluka o imenovanju sigurnosnog službenika za unutrašnji nadzor nad primjenom Zakona o zaštiti tajnih podataka, kao i odluka o imenovanju kurira, a u toku su aktivnosti štampanja, uvezivanja i otvaranja potrebnih knjiga eviencija iz izvještaja DSO-a o izvršenom instruktivnom nadzoru. Upućen je zahtjev DSO-u za instaliranje CHIASMUS software-a za razmjenu tajnih podataka stepena tajnosti „INTERNO,, (u toku su aktivnosti osiguranja računara sa USB stick-om i štampačem za ove namjene). Održana je obuka DSO-a BiH za uposlenike UIO koji će raditi na poslovima zaštite tajnih podataka. U narednom periodu su planirane aktivnosti na izradi Pravilnika o čuvanju tajnih podataka u UIO BiH, kao i obuka ostalih zaposlenih u UIO BIH koju će provoditi zaposlenici UIO BiH koje je DSO obučavao. Sigurnosno područje još nije opremljeno potrebnom sigurnosno-tehničkom opremom zbog nedostatka finansijskih sredstava u budžetu za 2015. godinu. U narednom periodu će biti poduzete aktivnosti na nabavci i ugradnji potrebne sigurnosno-tehničke opreme za zaštitu sigurnosnog područja. Do kraja 2015. godine je planirana nabavka sigurnosnog sefa za čuvanje tajnih podataka i uspostava sistema video-nadzora. Nakon nabavke i ugradnje potrebne sigurnosno-tehničke opreme iz izvještaja DSO-a BiH biće upućen zahtjev DSO-u za nadzorne aktivnosti u svrhu akreditacije i certifikacije sigurnosnog područja.

Agencija za zaštitu ličnih podataka u Bosni i Hercegovini – U proteklom periodu su obezbijedena finansijska sredstva za nabavku dijela sigurnosno-tehničke opreme za fizičku zaštitu sigurnosnog područja. U 2014. i 2015. godini je nabavljen dio opreme, a nabavka drugog dijela opreme je planirana u skladu sa odobrenim budžetskim sredstvima u 2016. godini. Nakon okončanja nabavke Agencija će obavijestiti DSO BiH. Uspostavljene su evidencije tajnih podataka, a priprema se i obuka zaposlenih iz ove oblasti uz saglasnost i odobrenje DSO-a.

Agencija za identifikaciona dokumenta evidenciju i razmjenu podataka BiH - U proteklom periodu su obezbijedena finansijska sredstva za nabavku dijela sigurnosno-tehničke opreme za fizičku zaštitu sigurnosnog područja, a nabavka drugog dijela opreme je planirana u 2016. godini.

Državna regulatorna agencija za radijacijsku i nuklearnu sigurnost - Konstatovano da Agencija ima potrebu za implementacijom mjera za zaštitu tajnih podataka te da će se u narednom periodu uz konsultacije DSO odrediti prioriteta na polju djelovanja na zaštiti tajnih podataka.

Muehlbauer d.o.o. Identifikovane naredne radnje i postupci za osiguranje zaštite tajnih podataka koji bi mogli biti predmet zaštite u ovoj firmi. Preostaje da se definiše potreba firme za određivanjem sigurnosnog područja te daljih mjera i postupaka na implementiranju Zakona i podzakonskih akata iz ove oblasti.

2. POLICIJSKE AGENCIJE U BOSNI I HERCEGOVINI

Direkcija za koordinaciju policijskih tijela Bosne i Hercegovine (DKPT BiH) – Korektivne mjere za otklanjanje uočenih nedostataka navedene u izvještaju DSO-a kojim je sigurnosno područje u DKPT BiH certificirano za rukovanje tajnim podacima Bosne i Hercegovine do i uključujući stepen tajnosti „VRLO TAJNO“ su u potpunosti ispunjene. Poštuju se procedure propisane Zakonom o zaštiti tajnih podataka i podzakonskim aktima donesenim na osnovu tog Zakona u vezi sa rukovanjem tajnim podacima Bosne i Hercegovine. Dana 28.10.2015. godine održan je sastanak sa predstavnicima DKPT BiH na njihov poziv, a na temu primjene propisa iz oblasti zaštite tajnih podataka. Na tom sastanku je naglašen „problem“ međunarodne razmjene tajnih podataka „većih“ stepena tajnosti, te je istaknuto da se do sada pomenuta razmjena odvijala putem kurira obzirom da nije uspostavljen elektronski zaštićen sistem razmjene tajnih podataka Bosne i Hercegovine „većih“ stepena tajnosti. Također, na ovom sastanku je istaknuta potreba za obuku kurira DKPT BiH za prijenos tajnih podataka u skladu sa međunarodnim standardima koju bi bilo neophodno održati u narednom periodu obzirom na činjenicu da se sve češće pojavljuju slučajevi da se tajni podaci „većih“ stepena tajnosti moraju dostaviti van granica Bosne i Hercegovine (ovdje se prvenstveno mislilo na zemlje u okruženju).

Državna agencija za istrage i zaštitu Bosne i Hercegovine (SIPA) – Korektivne mjere za otklanjanje uočenih nedostataka navedene u izvještaju DSO-a kojim je sigurnosno područje/podregistar u SIPA-i certificirano za rukovanje tajnim podacima Bosne i Hercegovine do i uključujući stepen tajnosti „VRLO TAJNO“, odnosno za rukovanje NATO tajnim podacima do i uključujući stepen tajnosti „NATO TAJNO/NATO SECRET“, su ispunjene, osim pitanja rezervne lokacije za tajne podatke. Preduzete su aktivnosti na iznalaženju najboljeg rješenja za osiguranje rezervne lokacije koja će biti propisno fizički i tehnički osigurana. Poštuju se procedure propisane Zakonom o zaštiti tajnih podataka i podzakonskim aktima donesenim na osnovu tog Zakona u vezi sa rukovanjem tajnim podacima Bosne i Hercegovine.

Granična policija Bosne i Hercegovine –Izvještajem DSO-a iz februara 2015. godine certificirano je sigurnosno područje/podregistar u GP BiH za rukovanje tajnim podacima Bosne i Hercegovine do i uključujući stepen tajnosti „VRLO TAJNO“, odnosno za rukovanje NATO tajnim podacima do i uključujući stepen tajnosti „NATO TAJNO/NATO SECRET“.

Agencija za školovanje i stručno usavršavanje kadrova Bosne i Hercegovine – Završen je postupak sigurnosnog provjeravanja za uposlenike čija su radna mjesta navedena u Odluci o listi radnih mjesta za pristup tajnim podacima i izdate su sigurnosne dozvole za sve pomenute uposlenike. Imenovani su administrator tajnih podataka, kurir za prijenos tajnih podataka (odluka će biti dostavljena DSO-u), kao i osoba koja će provoditi unutrašnji nadzor na provedbom Zakona o zaštiti tajnih podataka u Agenciji (sigurnosni službenik). U proceduri je izrada Plana čuvanja tajnih podataka i Plana za hitne situacije, a u toku je i otvaranje knjiga evidencija za tajne podatke. Pored toga, u toku je nabavka sefa za čuvanje tajnih podataka. Kako je naglašeno u zaprimljenom odgovoru, Agencija je privremeno smještena u sadašnjem objektu/prostorijama koje trenutno koristi i tu će se nalaziti do končanja Projekta izgradnje kompleksa za „trajni“ smještaj. Završetak ovog Projekta je planiran do 01.10.2017. godine. U skladu s tim Agencija planira finansijska sredstva za nabavku i ugradnju potrebne sigurnosno-tehničke opreme u novoizgrađenom objektu. Također, naglašeno je da se Agencija u svom radu ne susreće sa tajnim podacima „najviše tajnosti“.

Agencija za policijsku podršku Bosne i Hercegovine – Budžetom za 2015. godinu odobrena su sredstva za opremanje sigurnosnog područja potrebnom sigurnosno-tehničkom opremom navedenom u izvještaju DSO-a o izvršenom instruktivnom nadzoru. Pribavljene su ponude za

nabavku opreme i trenutno je u toku pokretanje postupka javne nabavke pomenute opreme. Očekuje se da se u što skorije vrijeme završe aktivnosti fizičke i tehničke zaštite sigurnosnog područja. Uz saglasnost DSO-a donesen je Pravilnik o zaštiti tajnih podataka u APP BiH. Donesene su i odluke o imenovanju sigurnosnog službenika i njegovog zamjenika, kao i kurira za prijenos tajnih podataka, te administratora tajnih podataka. Trenutno su u toku aktivnosti na ispunjavanju sigurnosnih upitnika, a kako bi se izvršile sigurnosne provjere zaposlenih u APP BiH koji rade na mjestima koja su navedena u odluci o listi radnih mjesta za pristup tajnim podacima. Nakon okončanja navedenih aktivnosti na uspostavi fizičkih i tehničkih mjera zaštite sigurnosnog područja biće upućen zahtjev DSO-u za akreditaciju i certifikaciju sigurnosnog područja u APP BiH.

Agencija za forenzička ispitivanja i vještačenja Bosne i Hercegovine – Preduzete su određene aktivnosti na uspostavljanju sigurnosnog područja ali iste nisu u potpunosti ispunjene. Naime, dio sigurnosno-tehničke opreme za opremanje sigurnosnog područja je nabavljen, a za nedostajući dio opreme se očekuje nabavka i ugradnja u narednom periodu. Donesene su odluke o listi radnih mjesta za pristup tajnim podacima i izvršeno je sigurnosno provjeravanje za lica navedena u odlukama, odnosno izdate su dozvole za pristup tajnim podacima pomenutim licima. U proceduri je izrada podzakonskih akata, a u toku su i aktivnosti na uspostavi potrebnih knjiga evidencija. Obzirom da su postojale određene nejasnoće u vezi sa nabavkom određene sigurnosno-tehničke opreme i uspostavljanje pojedinih procedura i postupaka za zaštitu tajnih podataka u AFIV-u BiH, dana 05.11.2015. godine je održan radni stručno-konsultativni sastanak u prostorijama AFIV-a BiH u vezi tih pitanja. Na tom sastanku je usaglašen redoslijed postupaka i aktivnosti za uspostavljanje potrebnih procedura za zaštitu tajnih podataka, a otklonjene su i nejasnoće u vezi sa nabavkom i ugradnjom nedostajuće sigurnosno-tehničke opreme za opremanje sigurnosnog područja u AFIV BiH. Po okončanju aktivnosti nabavke i ugradnje nedostajućeg dijela sigurnosno-tehničke opreme za zaštitu sigurnosnog područja, te ispunjenja potrebnih organizacionih mjera zaštite i uspostavljanja potrebnih sigurnosnih procedura i postupaka biće upućen zahtjev DSO-u za akreditaciju i certifikaciju sigurnosnog područja u AFIV BiH.

Agencija za prevenciju korupcije i koordinaciju borbe protiv korupcije Bosne i Hercegovine (APIK BiH) – Donesene su odluke o listi radnih mjesta za pristup tajnim podacima u APIK BiH, kao i odluke o imenovanju sigurnosnog službenika, administratora tajnih podataka, kurira za tajne podatke i njihovih zamjenika. Odluke su dostavljene na upoznavanje DSO-u. Određene su prostorije za uspostavu sigurnosnog područja, ali radnje i aktivnosti na nabavci i ugradnji potrebne sigurnosno-tehničke opreme za opremanje sigurnosnog područja navedene u ranijem izvještaju DSO-a o instruktivnom nadzoru u APIK BiH, nisu preduzimane u 2015. godini zbog neriješenog stalnog smještaja APIK BiH. U budžetu za 2016. godinu su planirana budžetska sredstva za nabavku određene sigurnosno-tehničke opreme (metalni i kartotečni ormari, vatrootporni sef).

Služba za poslove sa strancima BiH (SPS BiH) – Završen je prelazak u novu zgradu SPS BiH i upućen je zahtjev za akreditaciju i certifikaciju sigurnosnog područja. U toku izgradnje nove zgrade SPS BiH kontaktiran je DSO i predstavnici DSO-a su zajedno sa predstavnicima SPS BiH izvršili obilazak lokacije budućeg sigurnosnog područja. O navedenom obilasku lokacije je sačinjen izvještaj u kojem su precizirane organizacione, fizičke i tehničke mjere zaštite koje je potrebno uspostaviti u i oko budućeg sigurnosnog područja. U navedenom izvještaju je specificirana sva potrebna sigurnosno-tehnička oprema kojom je potrebno opremiti sigurnosno područje za zaštitu tajnih podataka u SPS BiH. Izvještaj je dostavljen SPS BiH na upoznavanje i postupanje po istom. Očekuje se da se u januaru 2016. godine izvrše nadzorne aktivnosti u SPS BiH u cilju akreditacije i certifikacije sigurnosnog područja za zaštitu tajnih podataka Bosne i Hercegovine u toj instituciji.

Policija Brčko distrikta Bosne i Hercegovine (PBD BiH) – U potpunosti implementiran najveći dio korektivnih mjera iz ranijeg izvještaja DSO-a koji je sačinjen nakon postupka akreditacije sigurnosnog područja u PBD BiH. Uspostavljene su potrebne sigurnosne procedure i postupci u vezi sa rukovanjem tajnim podacima, kao i u vezi sa djelovanjem u slučaju kriznih situacija. Za preostali dio korektivnih mjera koji je potrebno ispuniti, tj. po pitanju nedostajuće sigurnosno-tehničke opreme (odnosi se na kancelariju sigurnosnog službenika i rezervnu lokaciju), u toku je postupak nabavke. Nakon okončanja aktivnosti nabavke i ugradnje pomenute opreme, blagovremeno će biti obaviješten DSO. **Ovo sigurnosno područje je certificirano za rukovanje tajnim podacima Bosne i Hercegovine do i uključujući stepen tajnosti „VRLO TAJNO“.**

Ministarstvo unutrašnjih poslova Federacije Bosne i Hercegovine (MUP F BiH) – Uspostavljeno sigurnosno područje, tj. fizičke i tehničke mjere zaštite sigurnosnog područja, kao i organizacione mjere u najvećem dijelu. Dana 02.11.2015. godine izvršene nadzorne aktivnosti u svrhu akreditacije i certifikacije sigurnosnog područja. Sačinjen je izvještaj o izvršenom nadzoru kojim je sigurnosno područje u MUP-u F BiH certificirano za rukovanje tajnim podacima Bosne i Hercegovine do i uključujući stepen tajnosti „VRLO TAJNO“. Navedenim izvještajem su date određene preporuke i korektivne mjere koje je potrebno ispuniti ali koje nisu predstavljale prepreku za certifikaciju sigurnosnog područja sa aspekta personalne, dokumentacione i fizičke sigurnosti tajnih podataka. O ispunjenim korektivnim mjerama i otklanjanju uočenih nedostataka potrebno je u najkraćem mogućem vremenu obavijestiti DSO. DSO će i dalje pratiti aktivnosti u vezi sa rukovanjem tajnim podacima Bosne i Hercegovine u MUP-u F BiH i po potrebi vršiti nadzorne aktivnosti u oblasti zaštite tajnih podataka.

Ministarstvo unutrašnjih poslova Republike Srpske (MUP RS) – Započeta implementacija Zakona o zaštiti tajnih podataka, očekuje se u narednom periodu sprovođenje svih mjera i odluka za zaštitu tajnih podataka koje predviđa bh zakonodavstvo.

Ministarstvo unutrašnjih poslova Zeničko-dobojskog kantona (K MUP Zenica) – u potpunosti implementiran najveći dio korektivnih mjera iz ranijeg izvještaja DSO-a, tj. uspostavljene su potrebne sigurnosne procedure i postupci u vezi sa rukovanjem tajnim podacima, kao i u vezi sa djelovanjem u slučaju kriznih situacija. Pomenutim izvještajem DSO-a sigurnosno područje u K MUP-u Zenica je certificirano za rukovanje tajnim podacima Bosne i Hercegovine do i uključujući stepen tajnosti „VRLO TAJNO“,

Ministarstvo unutrašnjih poslova Zapadnohercegovačkog kantona (K MUP Ljubuški) – Izvršena je nabavka i ugradnja potrebne sigurnosno-tehničke opreme iz ranijeg izvještaja DSO-a, osim sefa za čuvanje tajnih podataka, te dva sigurnosna ormarića i sigurnosne aktovke za prijenos tajnih podataka, a za što je procedura nabavke u toku (Planirana su sredstva za ovu nabavku u budžetu za 2015. godinu). U narednom periodu će biti okončana nabavka navedene opreme nakon čega će biti upućen zahtjev DSO-u za akreditaciju i certifikaciju sigurnosnog područja u K MUP-u Ljubuški. U međuvremenu su također, donesene odluke o osobi zaduženoj za rukovanje ključevima, šiframa i kombinacijama, kao i o osobi koja će obavljati dužnost kurira za prijenos tajnih podataka. Odjel za profesionalne standarde je određen kao organizaciona jedinica koja će provoditi unutrašnji nadzor nad primjenom propisa iz oblasti zaštite tajnih podataka u K MUP-u Ljubuški. Knjige evidencija su izrađene ali nisu još otvorene i opečaćene. Još uvijek nije riješeno pitanje rezervne lokacije za tajne podatke.

Ministarstvo unutrašnjih poslova Srednjobosanskog kantona (K MUP Travnik) – Nije dostavljena informacija o aktivnostima na uspostavi sigurnosnog područja u 2015. godini. Ranije je imenovan sigurnosni službenik (predviđeno je mjesto sigurnosnog

službenika u sistematizaciji radnih mjesta u K MUP-u Travnik), a procedura izmjene pravilnika o sistematizaciji koje se odnose na administratora tajnih podataka kao i kurira za prijenos tajnih podataka je bila u toku. Također, sačinjen je prijedlog knjiga evidencija i prosljeđen je Upravi administracije u K MUP-u Travnik kako bi se iste odštampane. Isto tako, nabavljena su sigurnosna vrata i uspostavljen je sistem kontrole pristupa u sigurnosno područje. Ostale mjere i aktivnosti iz izvještaja DSO-a o instruktivnom nadzoru u K MUP-u Travnik nisu bile završene.

Ministarstvo unutrašnjih poslova Tuzlanskog kantona (K MUP Tuzla) – Za 2015. godinu su predložena potrebna finansijska sredstva za sigurnosno područje i planirana je bila nabavka potrebne sigurnosno-tehničke opreme za opremanje sigurnosnog područja, ali zbog nedostajućih finansijskih sredstava u budžetu Tuzlanskog kantona, realizacija nabavki još nije izvršena. U narednom periodu će biti nastavljen rad na realizaciji pomenute nabavke, nakon čega će biti upućen zahtjev DSO-u za akreditaciju i certifikaciju sigurnosnog područja u K MUP-u Tuzla.

Ministarstvo unutrašnjih poslova Livanjskog kantona/Kantona 10 (K MUP Livno) - U toku je procedura traženja najpovoljnijih ponuda za nabavku potrebne sigurnosno-tehničke opreme i ugradnju iste. Nakon realizacije ovih aktivnosti blagovremeno će biti upućen zahtjev DSO-u za akreditaciju i certifikaciju sigurnosnog područja.

Ministarstvo unutrašnjih poslova Hercegovačko-neretvanskog kantona (K MUP Mostar) – Određene su nove prostorije (nova lokacija) za uspostavu sigurnosnog područja za zaštitu tajnih podataka i kancelariju sigurnosnog službenika. Bivše prostorije koje su bile određene više nisu za tu namjenu jer bi potrebni građevinski radovi, kako smo obaviješteni, iziskivali velike finansijske troškove. Dana 19.11.2015. godine su izvršene aktivnosti instruktivnog nadzora na novoj lokaciji i sačinjen je izvještaj u kojem su precizirane organizacione, fizičke i tehničke mjere zaštite koje je potrebno uspostaviti u i oko sigurnosnog područja i kancelarije sigurnosnog službenika. U navedenom izvještaju je specificirana sigurnosno-tehnička oprema kojom je potrebno opremiti sigurnosno područje za zaštitu tajnih podataka i kancelariju sigurnosnog službenika u K MUP-u Mostar. Izvještaj je prosljeđen K MUP-u Mostar na upoznavanje i postupanje po istom.

Ministarstvo unutrašnjih poslova Kantona Sarajevo (K MUP Sarajevo) – Nisu završene započete aktivnosti na uspostavi sigurnosnog područja iz razloga što u budžetu za 2015. godinu nisu uvrštena sredstva za te namjene. U narednom periodu će se preduzeti sve neophodne mjere i radnje da se neophodna finansijska sredstva za ove namjene planiraju u budžetu za 2016. godinu, a kako bi se nastavilo sa započetim aktivnostima i realizirale propisane obaveze iz oblasti zaštite tajnih podataka, tj. kako bi K MUP Sarajevo nakon toga bio akreditovan i certificiran od DSO-a za rukovanje tajnim podacima Bosne i Hercegovine. Ranije je opremljena Policijska Stanica Vogošća, tj. završena je uspostava sigurnosnog područja, a što se tiče Policijske Stanice Novi grad Sarajevo i sjedišta K MUP-a Sarajevo, zaustavljena je tenderska procedura, tj. poništeni su tenderi za nabavku sigurnosno-tehničke opreme za zaštitu sigurnosnih područja.

Ministarstvo unutrašnjih poslova Bosansko-podrinjskog kantona (K MUP Goražde) – Izvršen je proces nabavke jednog dijela sigurnosno-tehničke opreme za opremanje sigurnosnog područja shodno ranije dostavljenom izvještaju, tj. specifikaciji opreme od strane DSO-a. Za nedostajući dio sigurnosno-tehničke opreme potrebna finansijska sredstva će biti planirana u budžetu za 2016. godinu. U međuvremenu je donesen plan obuke koji je usklađen sa Programom obuke DSO-a, donijete su odluke o imenovanju administratora tajnih podataka i kurira za prijenos tajnih podataka, kao i osobe zadužene za rukovanje ključevima, šiframa i kombinacijama. Izrađen je nacrt plana čuvanja tajnih podataka (predviđena je rezervna

lokacija koja nije osigurana alarmnim sistemom i sistemom kontrole pristupa) i odštampane su knjige evidencija koje nisu otvorene, a što će biti učinjeno nakon donošenja odluke o uspostavi administrativnog i sigurnosnog područja u K MUP-u Goražde. Također, određena je i organizaciona jedinica koja će provoditi unutrašnji nadzor nad provođenjem propisa iz oblasti zaštite tajnih podataka.

Ministarstvo unutrašnjih poslova Unsko-sanskog kantona (K MUP Bihać) – izvršen je proces nabavke jednog dijela sigurnosno-tehničke opreme za opremanje sigurnosnog područja shodno ranije dostavljenom izvještaju, tj. specifikaciji opreme sačinjene od DSO-a. U narednom periodu se planira nabavka i ugradnja nedostajućeg dijela sigurnosno-tehničke opreme, kao i izvođenje potrebnih građevinskih radova na prostoriji sigurnosnog područja, što je navedeno u izvještaju DSO-a. U međuvremenu je donesen Pravilnik o načinu obrade tajnim podacima u K MUP-u Bihać, donesena je odluka o listi radnih mjesta za pristup tajnim podacima, započet je proces popunjavanja sigurnosnih upitnika i vršenja sigurnosnih provjera, što se provodi u kontinuitetu. Određena je organizaciona jedinica koja će provoditi unutrašnji nadzor nad provođenjem propisa iz oblasti zaštite tajnih podataka u K MUP-u Bihać, a odluke o imenovanju sigurnosnog službenika i administratora i njihovih zamjenika, kao i kurira za prijenos tajnih podataka su u fazi donošenja. Odštampane su, te propisno otvorene i opečaćene sve potrebne knjige evidencija navedene u izvještaju DSO-a, a plan čuvanja tajnih podataka će biti donesen nakon uspostave sigurnosnog područja za zaštitu tajnih podataka.

Ministarstvo unutrašnjih poslova Posavskog kantona (K MUP Orašje) – zbog nedostatka novčanih sredstava nabavka potrebne opreme će se izvršiti u nekoliko faza.

Iz dostavljenih informacija se može uočiti da su navedene institucije na nivou Bosne i Hercegovine, kao i policijske agencije u Bosni i Hercegovini u dosadašnjem periodu preduzele niz aktivnosti na implementaciji propisa iz oblasti zaštite tajnih podataka i uspostavljanju sigurnosnih područja za zaštitu tajnih podataka, a kako bi u potpunosti postale funkcionalne u smislu rukovanja tajnim podacima u skladu sa Zakonom o zaštiti tajnih podataka i propisima donesenim na osnovu tog Zakona.

U većini dostavljenih informacija je navedeno da su u tim institucijama uglavnom u toku aktivnosti na nabavci i ugradnji potrebne sigurnosno-tehničke opreme za opremanje sigurnosnih područja za zaštitu tajnih podataka, odnosno da su u fazi ispunjenja naloženih mjera i aktivnosti koje su navedene u ranijim izvještajima Državnog sigurnosnog organa o izvršenom nadzoru.

Iz dostavljenih informacija se može zaključiti da će u narednom periodu biti upućen veći broj zahtjeva od strane gore navedenih institucija i policijskih agencija za akreditaciju i certifikaciju sigurnosnih područja za zaštitu tajnih podataka sa aspekta personalne, dokumentacione i fizičke sigurnosti tajnih podataka.

Kako ne bi došlo do „zastoja u rukovanju tajnim podacima“, tj. do obustavljanja slanja i prijema tajnih podataka od strane certificiranih institucija i agencija u narednom periodu bi trebalo, u skladu sa strateškim planom Državnog sigurnosnog organa BiH, staviti akcenat na pravosudne institucije (sudovi i tužilaštva na svim nivoima državne organizacije Bosne i Hercegovine) u smislu razvoja sistema sigurnosnih područja za zaštitu tajnih podataka, ali i razvoja sveukupnog sistema zaštite tajnih podataka u tim institucijama, obzirom da DSO nema informacija o tome da su one do sada preduzimale navedene aktivnosti u okviru implementacije propisa iz oblasti zaštite tajnih podataka (osim Visokog sudskog i tužilačkog vijeća Bosne i Hercegovine, Suda Bosne i Hercegovine i Tužilaštva Bosne i Hercegovine).

U narednom period će DSO insistirati na daljem razvoju sistema sigurnosnih područja unutar certificiranih institucija – terenski uredi, odnosno niže organizacione jedinice na terenu (što je zadatak sigurnosnih službenika i rukovodstva tih institucija), kako bi se u potpunosti na terenu moglo rukovati sa tajnim podacima, tj. kako bi se na terenu ostvarila puna operacionalizacija mjera i postupaka rukovanja tajnim podacima u skladu sa propisima iz ove oblasti.

Također, nadzorne aktivnosti i prikupljene informacije ukazuju na sve veću potrebu uspostavljanja sistema rukovanja tajnim podacima u elektronskom obliku u navedenim institucijama i agencijama, kao i na certifikaciji sistema za elektronsku razmjenu tajnih podataka u pomenutim institucijama. Ovo je pogotovo bitno u okviru policijskih agencija i pravosudnih institucija, a kako ne bi došlo do zastoja u funkcionisanju ovih institucija u smislu rukovanja tajnim podacima nakon certificiranja sigurnosnih područja za zaštitu tajnih podataka (što podrazumijeva, između ostalog, razvijanje, odnosno certificiranje sigurnosnih sistema i alata za razmjenu tajnih podataka Bosne i Hercegovine „većih“ stepena tajnosti u elektronskom obliku).

II – NADZOR NAD KRIPTOZAŠTITOM TAJNIH PODATAKA (INFORMATIČKA SIGURNOST – INFOSEC)

Odsjek za informatičku sigurnost Sektora za zaštitu tajnih podataka-Državnog sigurnosnog organa u 2015. godini je svoje aktivnosti obavljao u skladu sa dinamikom realiziranja predviđenoj Strateškim planom Ministarstva sigurnosti BiH. U nastavku nabrajamo najvažnije aktivnosti:

- Izrada Pravilnika o načinu akreditacije IKT sistema za obradu, prenos i pohranu tajnih podataka. Tokom 2015. godine formirano je neformalno radno tijelo koje je radilo na izradi prijedloga Pravilnika o načinu akreditacije IKT sistema za obradu, prenos i pohranu tajnih podataka. Ovaj pravilnik predstavlja provedbeni akt Državnog organa za sigurnosne akreditacije IKT sistema iz Odluke Vijeća ministara ("Službeni glasnik BiH" broj 31/10) za čiju provedbu je zaduženo Ministarstvo sigurnosti. Radna verzija Pravilnika je sačinjena i dostavljena Ministru sigurnosti. Za 2016. godinu je planirana izrada novih pravnih akata u oblasti zaštite tajnih podataka sa stanovišta informatičke sigurnosti. Planirana je izrada Pravilnika o kripto zaštiti u IKT sistemima za obradu, prenos i pohranu tajnih podataka.
- Aktivnost pružanja stručne pomoći drugim institucijama BiH, entitetima, kantonima i drugim organizacijama. U okviru ove oblasti predstavnici Odsjeka za informatičku sigurnost su u svojstvu predavača učestvovali u aktivnostima obuke državnih službenika na temu zaštite tajnih podataka sa osvrtom na informatičku sigurnost u organizaciji ADS-a Federacije BiH u Tuzli i Sarajevu te ADS-a BiH samo u Sarajevu.
- Mjerenje informatičke opreme u TEMPEST laboratoriji Državnog sigurnosnog organa Republike Češke u svrhu certificiranja iste. Također obavljena je kalibracija TEMPEST opreme u vlasništvu Ministarstva sigurnosti. Državni sigurnosni organ Republike Češke je na molbu Ministarstva sigurnosti Bosne i Hercegovine-Državnog sigurnosnog organa izašao u susret te Bosni i Hercegovini na korištenje ustupio tim i TEMPEST laboratoriju Državnog sigurnosnog organa Republike Češke. Laboratorija je iskorištena za TEMPEST mjerenje informatičke opreme koja treba da se koristi za obradu, pohranu i prenos tajnih podataka u institucijama i agencijama u Bosni i Hercegovini.

- Odsjek za informatičku sigurnost je u 2015. godini intenzivno radio na aktivnostima akreditacije IKT sistema za obradu, pohranu i prenos tajnih podataka u elektronskoj formi. Akreditovani su NATO IKT sistemi do i uključujući stepen TAJNO u:
 - Ministarstvu vanjskih poslova BiH,
 - Ministarstvu odbrane BiH,
 - Misiji BiH pri NATO-u i
 - Državnoj agenciji za istrage i zaštitu.

- Vršene su aktivnosti instruktivnog nadzora i pomoći prilikom provođenja mjera za zaštitu IKT sistema za obradu, pohranu i prenos tajnih podataka u elektronskom obliku u slijedećim institucijama:
 - Ministarstvu odbrane,
 - Ministarstvu vanjskih poslova,
 - Agenciji za istrage i zaštitu,
 - Agenciji za forenzička ispitivanja i vještačenja BiH,
 - Tužilaštvu Bosne i Hercegovine,
 - Državnoj regulatornoj agenciji za radijacionu i nuklearnu sigurnost,
 - MUP-u Bosansko-podrinjskog kantona Goražde,
 - MUP-u Hercegovačko-neretvanskog kantona Mostar,
 - MUP-u Zeničko-Dobojskog kantona Zenica,
 - Policiji Brčko distrikta BiH.

- TEMPEST tim Odsjeka za informatičku sigurnost Državnog sigurnosnog organa je tokom 2015. godine vršio TEMPEST mjerenja u:
 - Direkciji za koordinaciju policijskih tijela BiH u Sarajevu,
 - Parlamentarnoj skupštini BiH u Sarajevu,
 - Ministarstvu unutrašnjih poslova Zeničko-Dobojskog kantona u Zenici,
 - Ministarstvu unutrašnjih poslova Bosansko-Podrinjskog kantona u Goraždu,
 - Državnoj agenciji za istrage i zaštitu-SIPA u Sarajevu te
 - Policiji Brčko Distrikta BiH u Brčko Distriktu.

- CHIASMUS sistem za elektronsku razmjenu tajnih podataka stepena INTERNO između EU i Bosne i Hercegovine je sa 7 institucija korisnika u 2014. godini proširen te ga sada koristi 9 institucija u Bosne i Hercegovini:
 - Ministarstvo sigurnosti,
 - Misija BiH pri EU,
 - Misija BiH pri NATO-u,
 - Ministarstvo vanjskih poslova,
 - Ministarstvo odbrane,
 - Obavještajno-sigurnosna agencija,
 - Granična policija,
 - Državna agencija za istrage i zaštitu i
 - Direkcija za koordinaciju policijskih tijela.

- U kontaktima sa predstavnicima Delegacije Europske Unije u Bosni i Hercegovini, predstavnici Odsjeka za informatičku sigurnost su predvođeni pomoćnikom ministra sigurnosti za zaštitu tajnih podataka, gospodinom Mate Miletićem, uspjeli osigurati podršku te, kako je rečeno u obraćanju predstavnika Delegacije Europske Unije,

vjerovatno i potrebna finansijska sredstva za finansiranje projekta kojim bi se unaprijedio sistem zaštite tajnih podataka u Bosni i Hercegovini. Projekat nosi naziv „Zajednički informacioni sistem za sigurnosne provjere i izdavanje sigurnosnih dozvola u Bosni i Hercegovini“. Svrha projekta je uspostaviti zajednički informacioni sistem za sigurnosne provjere i izdavanje sigurnosnih dozvola u Bosni i Hercegovini, čime bi se osnažili kapaciteti relevantnih institucija u Bosni i Hercegovini kroz bržu, sigurniju i učinkovitiju obradu, prijenos i pohranu podataka povezanih sa sigurnosnim provjerama i izdavanjem sigurnosnih dozvola. Zajednički informacioni sistem bi kroz softver i hardver osigurao alate za jednostavno, sigurno i učinkovito rukovanje podacima u postupku izdavanja sigurnosnih dozvola kroz jednostavan unos istih, automatsko generiranje izvještaja i pregleda izdatih dozvola, brzo pretraživanje, itd. Procijenjena vrijednost projekta kreće se u rasponu od 200.000 EUR-250.000 EUR.

- Također, oblast elektronske razmjene tajnih podataka kao sastavni i nerazdvojni dio međusobne komunikacije između agencija za provođenje zakona, pravosudnih institucija, obavještajnih agencija, institucija obrane i drugih relevantnih institucija u Bosni i Hercegovini dobila je zasluženu pažnju u 2015 godini i tretirana je kroz proces konsultacija i izrade Sektorskog planskog dokumenta (Sector Planning Document-SPD) za sektor Unutrašnji poslovi (Home Affairs), sve u okviru programa korištenja Instrumenata predpristupne pomoći IPA II za Bosnu i Hercegovinu. Projekat poboljšanja i unaprijeđenja sistema za razmjenu tajnih podataka između agencija za provođenje zakona, pravosudnih institucija, obavještajnih agencija, institucija obrane i drugih relevantnih institucija u Bosni i Hercegovini (eng. Improving and enhancing the exchange of classified information between LEA, judiciary, intelligence, defence and other relevant institutions in BiH) uvršten je u Sektorski planski dokument za sektor Unutrašnjih poslova, a naveden je u okviru sektorske aktivnosti Borba protiv korupcije i organiziranog kriminala (Fight against corruption and organised crime) programirane za 2016. godinu. Vrijednost projekta procijenjena je na 2.700.000 EUR."

U narednom periodu je potrebno osigurati podršku Državnom sigurnosnom organu BiH u procesu potpunog usklađivanja zakonskih propisa Bosne i Hercegovine sa direktivama NATO-a i Odlukama EU, odnosno sa standardima EU i NATO-a, u oblasti zaštite tajnih podataka kao i radi provođenja nadzornih aktivnosti u cilju ispunjenja obaveza koje je Bosne i Hercegovina prihvatila potpisujući međunarodne sporazume iz ove oblasti, a prije svega sa NATO Savezom i Evropskom unijom. Takođe potrebno je raditi na podizanju svijesti prvenstveno kod rukovodioca institucija u Bosni i Hercegovini kao ovlaštenih lica u smislu Zakona o zaštiti tajnih podataka (Službeni glasnik BiH br. 54/05 i 12/09) za implementaciju propisa iz oblasti zaštite tajnih podataka u Bosni i Hercegovini.

POMOĆNIK MINISTRA

Mate Miletić
Mate Miletić